

ARREST  
DE LA COUR  
DE PARLEMENT,  
PORTANT SUPPRESSION  
de la Lettre écrite au Roy par Monsieur  
l'Euesque d'Aleſt.

A PARIS,  

---

M. DC. LXV.

1871

1871

1871

1871

1871

1871

1871

*ARREST DE LA COUR  
de Parlement, portant suppression de la Lettre  
escrite au Roy par Monsieur l'Euesque d'Allect.*

*Extrait des Registres de Parlement.*

**C**E jour, les Gens du Roy sont entrez, & M<sup>re</sup> DENYS TALON Aduocat General dudit Seigneur Roy, portant la parole, ont dit à la Cour: MESSIEURS, Nous auions cru qu'après la moderation qu'on auoit apportée avec tant de circonspection & tant de prudence, pour reprimer les nouvelles opinions, concernant la matiere de la Grace, qui depuis vingt années, ont fait tant de bruit, & excité tant de troubles dans l'Eglise, les esprits qui y sembloient les plus attachez, se laisseroient enfin conduire par le mouuement de ces Spheres, qui seules ont droit de donner le branle à toutes les autres; & par le sentiment vniuersel de ces premieres puissances, auxquelles nos consciences, aussi bien que nos fortunes, doiuent estre soumises, & dans la seule obeissance desquelles le monde Chrestien peut trouuer son assurance & son repos. Quoy qu'à la naissance de ces opinions, on eust assez reconnu quelle en pouuoit estre la suite; & combien il importoit d'esteindre cet incendie dès son commencement, & à la veüe de ses premieres estincelles; le Roy a eu cette religieuse retenue, & ce respect pour l'Eglise, d'attendre & le sentiment du saint Siege, qui n'a prononcé qu'après la

question pleinement agitée ; & le suffrage des Euefques de France, qui tous en general & en particulier, n'en ont approuué la decifion qu'apres plusieurs Conferences, & vn grand nombre d'Affemblées. Cependant bien que les Bulles des deux Papes, qui ont fi nettement condamné les cinq Propositions portées à Rome, comme extraites des Liures de Iansenius, ne puiſſent receuoir, ny d'interpretation ny d'atteinte, bien qu'il ſoit de notorieté publique, que lors qu'on les a ſouſtenües, elles ont eſté principalement appuyées ſur l'autorité du Nom & de l'erudition de cét Auteur, & ſur les grandes lumieres qu'il auoit puiſſées dans les œuvres de ſaint Auguſtin, dont ſes Sectateurs ébloüis, ou pluſtoſt abuſez par l'eſclat du titre de ſon Liure, pretendoient qu'il auoit fait reuiure la Doctrine dans ſes eſcrits. Apres neantmoins que ces Propositions ont eſté ſi ſolemnellement condamnées, & que leur deſenſe ne pouuoit plus eſtre ny licite ny innocente, l'on n'a pas laiſſé d'inuenter vne nouuelle ſubtilité, pour en réueiller la diſpute. L'on a partagé l'autorité des Bulles, & le pouuoir de l'Egliſe, & pretendu que la ſoumiſſion des eſprits à la decifion des Papes, quant au Droit, ne portoit aucun prejudice, & ne tiroit aucune conſequence pour la queſtion du Fait. Qu'ainſi l'on pouuoit ſouſtenir, que ces meſmes Propositions tant de fois ſouſtenües, & tant de fois deſendües ſous les eſtendarts de Iansenius, auoient comme par vn art magique, diſparu de ſes eſcrits. Si lors on euſt voulu agir, nous ne dirons pas avec rigueur, mais ſeulement avec la fermeté que peuuent ſouffrir, & que doiuent meſme deſirer, & le reſpect du ſaint Siege, & la paix de l'Eſtat, &  
la

la hayne de la nouueauté, & de la chicane dans vne  
matiere si importante & si serieuse, n'auroit-on pas pû  
d'abord fermer la bouche à ces disputes captieuses, &  
obliger tous les particuliers, sans exception de quali-  
tez ny distinction de personnes, à souscrire les deux  
Bulles, sur tout, après qu'elles ont esté receuës & pu-  
bliées dans tous les Dioceses, autorisées par le suffrage  
& l'approbation expresse ou tacite de tous les Prelats de  
France, sans qu'un seul les ait ouuertement rejetsées.  
Mais il n'y a aucune de toutes les voyes qui se prati-  
quent en semblables occasions, pour appaiser les ora-  
ges dont l'Eglise est si souuent agitée, que le Roy n'ait  
voulu tenter auparavant, afin de gagner les esprits plus-  
tost par la raison que par contrainte; & les ramener à  
leur deuoir, plustost par les liens de la douceur, que par  
les chaines de la feuerité. Pour cela il a tant de fois  
conuoqué des Euesques: Pour cela, il a encore desiré  
des Assemblées en Sorbonne, dont on sçait assez les  
resolutions, & avec quelle vigueur on a retranché de  
cét illustre Corps tous les membres rebelles à ces decla-  
rations & fermes à ne les point approuuer par leurs si-  
gnatures. Pour cela desirant fermer la bouche aux Dis-  
ciples de Iansenius, & ne leur laisser aucun pretexte de  
combattre, ny mesme de blasmer le jugement du saint  
Siege, il a par vne premiere Declaration voulu approu-  
uer les deux Constitutions, afin de leur donner par le  
concours de la puissance Ecclesiastique & Seculiere, le  
dernier caractere d'une autorité legitime. Pour cela  
encore, il a refusé l'entrée des Prelatures à ceux que l'on  
pouuoit soupçonner d'estre infectez de cette Heresie  
naissante. Pour cela, il s'est opposé à leurs caballes & à

leurs entreprises. Pour cela, enfin, il a fermé les Escoles & les Seminaires, où cette mauuaise doctrine estoit enseignée, & pris tous les soins necessaires pour estouffer ce monstre dans son berceau. Mais toutes ces precautions n'estant pas suffisantes pour empescher le progres d'un mal si dangereux; & le Roy ayant esté informé par les Euesques de son Royaume, qu'apres vne si longue dissimulation, apres vne patience de tant d'années, apres tout le loisir accordé aux esclarcissemens & aux conferences, apres auoir inutilement esperé de voir le calme restably dans l'Eglise par vne heureuse reünion des esprits, il se trouuoit encore vn grand nombre de personnes opiniastrs dans leur premier sentiment, & que ce feu caché sous la cendre, pouuoit encore, s'il estoit negligé, causer de nouueaux embrazemens. Ces Prelats d'ailleurs n'ayant point trouué de remede plus prompt, ny plus efficace pour en arrester le cours, que la souscription d'un Formulaire qu'ils ont dressé avec beaucoup de soin, & qui a depuis esté approuué par plusieurs deliberations differentes. Dans cette veüë, & pour retrancher à jamais cette funeste diuersité d'opinions capables de partager les cœurs, & de degenerer en vn effroyable schisme, il a esté jugé necessaire d'obliger, suiuant la coutume ancienne des Conciles, tous ceux qui ont part au ministere de l'Eglise, de souscrire ce qui ne peut plus estre mis en dispute, sans quelque sorte de rebellion. Pour rendre cette obligation plus celebre, & luy donner plus de poids & d'autorité, le Roy s'est bien voulu luy-mesme expliquer en ce lieu par vne Declaration publique & solemnelle; Mais avec quelle pru-

dence, & avec combien de temperament ce grand ouvrage a-t-il esté consommé? Comme on estoit aduerty que quelques Euesques, preuenus par l'artifice des disciples de Iansenius, faisoient difficulté d'ordonner la souscription de ce Formulaire, & qu'eux-mêmes ne l'auoient pas dissimulé, la principale difficulté a esté de sçauoir de quelle façon on procederoit, tant à leur esgard, que de tous les autres Ecclesiastiques de leurs Dioceses. L'affectation d'une conduite singuliere, si peu conforme à l'esprit de l'Euangile, a quelque chose de si odieux, qu'il suffisoit que ce Formulaire auoit esté composé par vne nombreuse assemblée de Prelats & d'autres Ecclesiastiques; Que plus de quatre-vingts Euesques l'auoient vnaniment approuué, & que le Roy l'auoit autorisé par sa Declaration, à leur instante priere, pour les assujettir à la Loy commune, & leur imposer le joug de suiure le sentiment du plus grand nombre. Et bien que d'ailleurs, comme membres d'un mesme Corps, soumis à vn mesme Chef, sujets d'un mesme Prince, ils fussent selon l'ordre de la Hierarchie, tant Ecclesiastique que Seculiere, & tant par la dignité de leur caractere, que par leur serment de fidelité, plus obligez que tous les autres à donner au public vn exemple de soumission & d'obeissance, sans laquelle la tranquillité ny de l'Eglise ny de l'Estat ne peut estre solidement establee, les mouuemens contraires de ce premier Ordre ne s'excitant jamais sans peril de diuision & de schisme. Le Roy toutesfois pour preuenir ces guerres intestines qui naissent de la diuersité des opinions des Ministres de l'Eglise, a voulu suiure les expediens les plus moderez & les plus doux. Et

pour oster tout sujet de plainte, il a resolu de donner des bornes à sa Declaration, & de n'y pas comprendre les Euesques, faisant reflexion d'un costé, que les Assemblées du Clergé, dans lesquelles le Formulaire auoit esté composé, n'auoient ny le nom, ny l'autorité de Conciles, considerant d'ailleurs que de preuoir l'esgarement de quelques Prelats de la voye commune, estoit sinistrement augurer de leur conduite; Que de prononcer par aduance des peines sur des soupçons d'une desobeissance incertaine, & menacer de saisie de leur temporel, & d'autres chastimens rigoureux, sans assurance de trouuer des rebelles, estoit faire tort à leur dignité. Se representant enfin que si ny l'exemple des plus soumis, ny le zele pour maintenir l'vnité de l'Eglise, ny tous les autres motifs de charité & de prudence ne pouuoient reduire l'esprit de quelques Euesques à la signature du Formulaire, il valloit encore mieux, toutes choses balancées & meurement obseruées, tolerer quelque temps ce desordre, que de s'engager par des procedures precipitées en des inconueniens plus fascheux. Tels ont esté les motifs & les raisons qui ont forcé le Successeur des vertus & de la pieté de saint Louis, de ménager l'ardeur de son zele, de le laisser pleinement agir enuers quelques-uns, de le moderer à l'esgard des autres; d'armer la Loy de toute sa feuerité contre les refractaires aux ordres de leurs Diocesains, & comme tels, les despoüiller de leurs Benefices, & les chasser du Temple qu'ils prophanent par leur desobeissance, en les rendant incapables d'en posseder à l'aduenir; de dissimuler au contraire à l'esgard de ceux dans les Dioceses desquels les Euesques n'auoient

n'auroient point fait publier le Formulaire; & sans menacer ny les Prelats, ny leurs inferieurs d'aucun chastiment; attendre du secours du Ciel, & du temps, qu'un rayon de lumiere dissipe les tenebres de leur aveuglement. Mais l'opiniaistreté de leur refus destitué de raison, & condamné par tous les sages, ayant rendu leur foy & leur conduite suspecte, le Roy par le droict qu'il a d'imposer des Loix pour regler la possession des Benefices, les priue de toute esperance d'en pouuoir acquerir, ce moyen luy ayant semblé le plus propre pour dissoudre ce qu'on auoit repugnance de rompre, & le plus asseuré pour rappeler les esprits rebelles à la connoissance de leur deuoir. Et pour oster de plus tout pretexte à ceux qui font leur séjour, ou qui sont en possession de quelques Benefices dans les Dioceses où la souscription n'est point ordonnée, & les mettre en estat de rendre un telmoignage public de leur soumission, le Greffe du Bailliage plus proche leur est ouuert pour receuoir leurs signatures. Que si la Declaration n'oblige pas precisément les Euesques de faire souscrire le Formulaire, il ne s'ensuit pas qu'elle leur permette de le censurer. S'ils ont la liberté de ne s'en pas seruir, ils ne l'ont pas de semer des Escrits scandaleux pour le décrier. S'ils ne veulent pas joindre leur voix à celle de toute l'Eglise, ils ne doiuent pas mesler des tons discordans qui en puissent troubler l'harmonie. Et la defense de ne combattre ny de viue voix, ou par escrit, aucun article du Formulaire, estant vne Loy generale, & qui ne regarde pas moins la Police que la Religion, l'on ne void pas par quel priuilege aucun Euesque ose pretendre d'en estre excepté.

Cependant l'excès d'une telle retenüe, & la deference que l'on a voulu rendre au caractère des Prelats, & à la Jurisdiction spirituelle qu'ils exercent dans leur terriroire, & le soin qu'on a pris d'éviter tout ce qui pourroit faire naistre la jalousie, ou donner pretexte à vn combat d'autorité, n'a pas esté par tout suivi d'un succès favorable, les caballes & les artifices des lansenistes ayant esté assez puissans pour empêcher quelques Euesques, en assez petit nombre, de donner leurs Mandemens pour la publication du Formulaire, pour surprendre leur Religion par des déguisemens & de fausses couleurs; & pour leur inspirer le dessein d'attaquer sous ombre de zele d'austerité & de reformation l'une & l'autre puissance, Ecclesiastique & Temporelle. Nous voulons croire que cette pensée a esté le seul motif d'une Lettre escrite au Roy par Monsieur l'Euesque d'Aléct, & que sa Majesté nous mit hier en original entre les mains. Nous devons ce tesmoignage à la conduite de ce Prelat, qu'il est en reputation d'exercer avec beaucoup de pieté, de sagesse & d'assiduité toutes les fonctions de son ministere: mais avec tout le respect qui est deu tant à sa dignité qu'à son merite, nous ne pouvons tomber d'accord que cette grande opinion qu'il a conceüe de la Majesté de son Sacerdoce, puisse estre vn fondement legitime pour taxer, ainsi qu'il fait par sa Lettre, & la conduite de la plupart des Euesques du Royaume, & la Declaration du Roy, & l'Arrest de verification du Parlement, comme une entreprise sur la religion des Autels, & comme une profanation du Sanctuaire executée par des mains sacrileges, estenduës non pour soutenir l'Arche sur son

panchant , mais pour acheuer de la renuerfer dans fa cheute.

Mais auant que de faire connoistre iufques à quel point cette Lettre eft injurieuſe à l'autorité du Roy , & combien de trouble & de ſcandale elle peut exciter dans l'Egliſe ; il faut examiner quel eſt le deſſein de ſon Autheur , & ſur quels fondemens il l'appuye. Quant au premier, il n'eſt que trop viſible par ſes propres explications, qu'il n'a d'autre but en tout ſon diſcours que de battre en ruine la Declaration par laquelle le Roy a ordonné la ſouſcription du Formulaire. Et pour reüſſir enſuite dans ſa pretention , il ſuppoſe d'abord comme vn principe certain & comme vne verité connuë , que l'heréſie des Ianſeniſtes eſt vne chimere ſans fondement , & que l'on a ſurpris la Religion de ſa Majeſté, quand on luy a fait entendre qu'il reſtoit encore des perſonnes infectées de cette erreur dans ſon Royaume; d'où il conclud, Que le remede eſt inutile, lors qu'il ne paroïſt aucun mal. Puis, de cette premiere propoſition, paſſant à vne autre plus dangereuſe, il ſouſtient, Que cette declaration eſt vne pure entrepriſe ſur la juridiſtion Eccleſiaſtique, & que tant ceux qui en ſont les auteurs, que les autres qui ſ'y ſoumettent, encourent les cenſures portées par les Conſtitutions Canoniques contre les violateurs des libertez de l'Egliſe; adjouſtant enſuite que le Formulaire n'eſtant ny l'ouurage du Pape, ny des Eueſques aſſemblez dans vn Concile, perſonne n'eſt obligé d'y ſouſcrire, cette ſignature eſtant bien plus capable de troubler la paix de l'Egliſe que de l'eſtablir. Mais ſi l'on fait tant ſoit peu de reflexion ſur la prudence avec laquelle cette Declaration a eſté concer-

tée sur l'artifice des libelles, long-temps avant qu'elle ait veu le jour, publiez sous vn faux pretexte d'en représenter les mauuaises consequences, & qui contenoient à peu près les mesmes raisons que cette Lettre ; Et si d'ailleurs l'on obserue que le Roy ne l'a accordée que sur les remonstrances d'un grand nombre d'Euesques qui luy en ont représenté l'vtilité, ou plustost la necessité ; qui ne s'estonnera que Monsieur d'Aleët, que l'on peut raisonnablement soupçonner d'estre protecteur des Iansenistes & lié d'intereſt avec eux, ne pouuant ignorer toutes ces choses, pretende s'ériger en censeur, & se donner à luy seul la liberté de condamner vne Declaration desirée, approuuée & mesme executée par ses Confreres : vne Declaration que le plus grand Monarque de l'Europe a luy-mesme apportée dans cet auguste Tribunal, comme vn auguste monument de sa pieté, & que tous les autres Parlements, sans nulle difficulté, ont depuis enregistré. Vne Declaration enfin qui n'a pour but que l'vnité de la Foy, le repos des consciences, & la paix de l'Eglise. Qui donc pourroit regarder sans indignation vne entreprise injurieuse à l'autorité royale, conceuë & executée par celui qui à cause de son caractere & de son serment, est obligé d'enseigner l'obeïſſance au peuple tant par ses discours que par son exemple. D'ailleurs, si en quelque occasion que ce soit il est si perilleux de souffrir qu'aucun, pour éclatante que paroisse sa dignité, se donne la liberté de censurer la volonté du Prince & les ordres les plus solidement establis ; combien plus en matiere de Religion & de doctrine, & quand le Censeur est vn Prelat qui fait profession d'une vertu  
seuere,

seuere, & qui se rend remarquable par son austerité? Mais pour descendre au particulier de la difficulté presente, n'est-ce pas vne chose surprenante de voir vn Pasteur de cette consideration commencer vne Lettre par cette proposition generale, Qu'il ne se trouue point en France d'heresie du Iansenisme, & que tout ce que l'on a publié sur ce sujet n'est qu'une pure illusion, qu'une chimere & qu'un monstre que l'on se forme pour auoir la gloire de le combattre? N'est-ce pas le langage ordinaire des deffenseurs de Iansenius? Ont-ils rien repeté si souuent dans leurs escrits depuis plusieurs années? Les plaintes qu'ils ont formées à l'esgard des procedures faites contr'eux, & qu'ils ont blasimées dans leurs escrits comme autant d'injustes persecutions & de violences exercées contre des Ecclesiastiques d'une vie irreprochable, ont-elles eu d'autre fondement? Mais pour grand que soit l'artifice à cacher ce poison subtil, & malgré toutes leurs protestations & leurs Declarations frauduleuses, les Bulles emanées de Rome contre cette erreur, ne sont-elles pas autant de temoins qu'elle n'est pas entierement deracinée? Ne paroist-il pas outre cela, par les Registres des Assemblées, & des deliberations du Clergé, que plus de quatre-vingts Euesques sont dans le mesme sentiment, & tous persuadés que c'est vn feu caché sous la cendre, capable de produire de tres funestes embrasemens si l'on n'en esteint jusques aux moindres estincelles? Quel conseil donc meilleur le Roy pouuoit-il prendre, luy qui estoit pleinement informé des brigues & des cabales continuelles qui se faisoient pour l'appuy de ces nouuelles opinions, que d'arrester, suiuant l'aduis

de ces Prelats, le cours de telles nouveautez par la signature d'un Formulaire de profession de Foy? Et apres cela, Monsieur d'Aleët se presumant plus sage & plus esclairé que ny les Roys, ny les Papes, ny les Princes de l'Eglise, condamnera hardiment leur conduite, & fera passer tous leurs soins & leurs precautions pour des remedes inutiles? Se peut-on rien figurer qui choque plus ouvertement & l'honneur du saint Siege & la dignité Episcopale, & l'autorité Royale. S'il s'estoit contenté de publier que son Diocese n'estoit point infecté des erreurs contenuës dans le Liure de Iansenius, & d'employer ce pretexte pour s'excuser de la publication du Formulaire; peut-estre les esprits auroient-ils pû se reposer sur la foy de ses paroles. Peut-estre se seroit-on figuré, que pour publiques que se soient renduës les cinq Propositions dans toutes les Prouinces & les Villes du Royaume, son Clergé neantmoins auroit pû se preserver de ce poison par l'assiduité avec laquelle il traueille au salut des peuples soumis à sa conduite. Peut-estre enfin que sans la Lettre & la protection qu'il continuë de donner aux Iansenistes, l'on auroit pû presumer qu'il ne gardoit le silence que pour le bien de la paix, & pour empescher que la curiosité n'allumast ces disputes dans vn lieu où elles estoient entierement inconnuës. Mais d'avancer que dans nul endroit de la France, ce venin ne s'est respandu, d'accuser par là, ou d'imposture, ou d'ignorance, toutes les puissances Ecclesiastiques & Seculieres, c'est en verité rompre toutes les mesures du deuoir & du respect, & passer par dessus toutes les regles de la modestie & de la bien-seance. Car de dire en suite, que

chacun se soumet à la décision du Pape pour la question de Droit, & qu'ainsi il ne reste plus de dispute que pour le Fait, qui n'est pas vne matiere de Foy; n'est-ce pas le dernier retranchement des Disciples de Iansenius? N'est-ce pas le prétexte dont ils se seruent pour colorer leur desobeissance? N'est-ce pas enfin, la source de tous ces libelles composez pour se defendre de la souscription du Formulaire? Mais quelques raisons & quelques exemples qu'ils ayent pû alleguer pour fortifier cette distinction, les plus clair-voyans n'appërçoient-ils pas que ce n'est qu'une euasion recherchée par ceux qui dans leur ame persistent dans l'erreur des cinq Propositions, afin de pouuoir vn jour ressusciter la Doctrine condamnée? En effet, sans auoir besoin de fouiller plus auant dans l'antiquité, pour trouuer les exemples des Conciles qui ont prononcé sur des questions de Fait, & menacé d'anatheme & de deposition les Euesques qui refusoient de se soumettre, & de souscrire à leur iugement. Y a-t-il controuerse dans l'Eglise ou dans l'Estat, soit de Droit, soit de Fait, qui ne puisse estre décidée? & comme dans l'usage du Palais, nous disons que le Faux ne se couure point, sinon lors que la question en a esté agitée, & précisément décidée, combien plus vne erreur de Fait, dont la lecture peut souuent tromper les plus habiles, peut-elle estre en tout temps releuée par les hommes qui font profession de literature; mais lors qu'un Arrest interueni apres vne longue instruction, a prononcé sur la verité ou sur la fausseté d'une piece, il en faut demeurer à l'autorité des choses jugées; & celuy qui a perdu sa cause ne peut plus sans temerité, & sans s'ex-

posera à vn chastiment rigoureux, en éluder l'exécution, sous pretexte que ses yeux le conuainquent du contraire. Ainsi apres que les cinq Propositions ont esté condamnées; apres que la question, si Iansenius en estoit l'Authéur, de nouueau agitée, a esté, par vne seconde Bulle, nouuellement decidée, apres que la mesme dispute portée en Sorbonne, a esté avec vn pareil succez déterminée. Apres enfin que, & la Bulle du Pape, & la resolution de la Faculté de Theologie examinées par des Commissaires à ce deputez, ont esté ensuite de plusieurs Consultations & Deliberations des Euesques, par eux solennellement approuuées, de quel front certains particuliers en petit nombre osent-ils pretendre de faire preualoir leurs caprices aux jugemens de tant de Corps celebres, & de tant d'autoritez? Sera-ce assez pour secoüier le joug de l'obeïssance de s'escrier avec emportement, Qu'il ne faut que lire pour les confondre ou pour se conuaincre, & que les yeux suffisent pour estre les Iuges de cette dispute? Mais de quelle grace surnaturelle sont-ils pourueus? Qui leur donne ce priuilege, que leurs yeux soient seuls plus clair-voyans que tous les autres? N'y a-t-il pas au contraire sujet de croire qu'ils ont des rayes qui obscurcissent leur veüe, ou qu'ils sont tombez dans cetaueuglement volontaire dont parle le Prophete? Ne vaut-il pas mieus douter de cette mission extraordinaire & de cette plenitude de lumiere, dont ils se flattent, que de faire injure à toutes les puissances de l'Eglise, en les accusant d'imposture? Quelle apparence donc que l'on puisse les dispenser de l'obligation de la signature, à present que les choses sont reduites à telles extremités, qu'il faut, ou que les

Sectateurs

Seçtateurs de Iansenius obeïssent aux Décrets de l'Eglise, ou que ses principaux Ministres soient deshonorés? Si ces contestations n'auoient point d'autres motifs que la recherche de la verité, & l'edification des Ames, quelque peine que pussent auoir à se laisser persuader ceux qui en sont les premiers mobiles & les principaux auteurs, ne deuroient-ils pas par vn esprit de soumission, souscrire volontairement pour donner exemple aux autres, & tarir par ce moyen la source des diuisions & des scandales que leur opiniastrété excite dans l'Eglise. Plus le differend est leger, moins excusable est leur desobeïssance. Il ne s'agit point de faire le procez à vn Euesque, ny de flestrir sa memoire: Il est mort dans la communion de l'Eglise. Il s'est soumis à son jugement. Il a fait paroistre tant de deference pour son autorité, qu'on a lieu de croire qu'il desapprouueroit, s'il viuoit, la conduite de ses Disciples; Qu'il auroit supprimé son Liure s'il auoit preuë l'esclat & le scandale que cet ouurage a excité dans la République Chrestienne; Que n'estant plus en estat d'expliquer le sens & la force de ses paroles, il ne l'a pas moins laissée Iuge de ses intentions & interprete de ses pensées, que de la censure de sa Doctrine. Mais quoy qu'il en soit, est-il juste que des personnes si delicates pour la reputation d'un homme seul, ne soient touchées d'aucune jalousie pour l'honneur de toute l'Eglise? Qu'ils ayent moins de respect pour l'Espouse de IESVS-CHRIST, que pour les cendres d'un Euesque; Qu'ils regardent comme vn monstre horrible la condescendance à signer ce que le Pape, les Euesques, & la Faculté de Paris rapportent du sens & des paroles d'un Auteur, & ne comptent pour

rien les troubles qu'ils souleuent par leurs rebellions dans la plupart des consciences? Nous sçauons que l'on a publié grand nombre de discours pour effrayer les ames timides; mais ce ne sont que des phantomes qui se dissipent d'abord qu'on fait reflexion, que ce n'est ny le zele de la cause de Dieu, ny l'intereſt du salut; mais l'intrigue d'une forte cabale, qui par des ressorts secrets & des liaisons cachées a enfanté ces ouurages de nuit pour semer la diuision par tout, & exciter vne reuolte. A quoy pour mieux reüssir les Chefs de ce party affectent vne vertu seueres, & vne fausse constance, afin de conseruer leur credit, & s'ouurir par là vne entrée plus facile dans l'esprit des foibles, qui se laissent preuenir par les moindres apparences. Nous dirons bien plus, que si l'on veut parler de bonne foy, on confessera que la principale raison qui les empesche d'exécuter ce que l'une & l'autre autorité exige de leur obeïſſance, n'est autre que la peine qu'ils ont de rendre les armes, apres les premiers pas qui les ont engagés à combattre le Formulaire; la honte de se dédire, apres l'auoir si outrageusement décrié, & la crainte de perdre par cette soumission la creance qu'ils se sont acquise dans l'esprit des partisans de leur Secte. En effet, que peut-on remarquer en cet ouurage, contre lequel on s'esleue avec tant de force, qui soit contraire à la sincerité de la Foy, & à la pureté des bonnes mœurs? A-t-on souſtenu que les Assemblées, dans lesquelles il a esté composé, ayent pû luy donner la meſme autorité qu'aux Canons? N'a-t-on pas toujours ingenuement confessé que le pouuoir d'expliquer les dogmes de la Foy, estoit vn priuilege reſerué

aux Synodes Prouinciaux, ou Nationaux? Cela toutes-fois peut-il empescher que le consentement des Euefques, qui tous le regardent comme l'effet de l'vnion de leurs esprits, & comme vne sage precaution puisée de l'usage des Conciles, ne puisse suppléer à ce défaut? Quoy donc! l'opinion d'un seul Prelat l'emportera sur le commun sentiment de plusieurs; & Monsieur l'Euefque d'Aléct aura droit de censurer avec aigreur ce qu'un si grand nombre a si solemnellement approuué! Que peut-on remarquer en ce Formulaire qui ne soit conforme aux Bulles d'Innocent X. & d'Alexandre VII? N'est-ce pas un pressis tout pur, & toute la substance en abrégé des deux Constitutions Apostoliques? Bien plus, n'a-t-il pas esté autorisé de ce dernier, lors qu'il a obligé les grands Vicaires de l'Archeuesché de Paris, de se retracter; d'enuoyer un second Mandement contraire au premier qu'ils auoient publié, & de faire souscrire le Formulaire sans reserve & sans distinction. Et si en paroles expresses il ne l'a pas confirmé, & s'il n'a pas précisément imposé à tout le monde la necessité de le signer, qui ne sçait que c'est vne pure jalousie de Iurisdiction, la Cour de Rome ne voulant faire aucun pas, dont les Euefques puissent tirer aucun auantage, dans les justes pretentions qu'ils ont de pouuoir dresser des Formulaires de profession de Foy. Ce qui n'a pas toutesfois empesché le Pape de leur laisser dans son dernier Bref, vne pleine liberté de se seruir de tous les moyens qu'ils jugeront les plus conuenables pour preuenir le Schisme, dans lequel ces disputes auroient sans doute degeneré, si en quelque vne des parties de l'Empire Chrestien, elles auoient

esté fauorisées de l'appuy & de la protection des puissances Temporelles. Bien plus, il condamne le procédé de ces Nouateurs : Il declare que leurs soumissions ne sont ny suffisantes ny sinceres, & qu'ils ne sont point encore rentrez dans le chemin de l'obeissance & de la verité. Bien loin donc de croire que l'orage soit appaisé, il exhorte les Euesques à veiller au salut de l'Eglise, & de destourner avec autant d'adresse que de fermeté, la tempeste dont elle est menacée. Il ne leur prescrit rien en particulier. Il leur laisse vne entiere liberté du choix des remedes qu'ils croiront les plus efficaces pour confondre l'erreur, & terminer cette funeste diuision. Sa pensée n'est donc pas qu'ils demeurent dans le silence au milieu du peril, & qu'ils souffrent par leur dissimulation ou par leur negligence, que ces mauuaises semences se respendent de tous costez. Il les inuite au contraire, d'appliquer avec soin & avec vigueur, la cognée à ces troncs funestes; d'arracher ces plantes malheureuses, d'empescher le progres de leurs racines, & la suffocation des veritez orthodoxes & Chrestiennes. Qui ne s'estonnera donc, qu'apres vne communication si cordiale & si mutuelle de l'Eglise Romaine & Gallicane, les Euesques ne trouuant ny d'antidote ny de preseruatif plus assure contre ce subtil poison, qui s'insinuë dans les esprits, que la signature d'un Formulaire, qui ne contient rien que de tres orthodoxe, Monsieur l'Euesque d'Alext ose traiter ce modele, & ceux qui en sont les Auteurs avec autant d'injures, que s'il estoit remply de propositions heretiques, & qu'il menace d'anatheme les Ecclesiastiques de son Diocese, qui le signeront. Qui ne juge par ce procedé qu'il

qu'il se separe de la communion de tous les Euesques de France qui l'ont approuué ? Mais il passe bien plus auant. Il pretend que le Roy a beaucoup excédé les bornes de son pouuoir, lors qu'il a obligé les Ecclesiastiques de son Royaume à le signer. Que les Princes ses predecesseurs ont tousiours attendu l'autorité de l'Eglise, sur les poincts de la Foy. Qu'ils ont bien fuiuy, & tres-souuent appuyé le sentiment des Conciles, soit pour la decision des questions de Doctrine, ou pour les reglemens de la Police; mais que jamais ils ne les ont preuenus. L'on pourroit bien examiner en cette occasion, quelle place l'Onction sacrée donne dans le Sanctuaire à nos Rois; quelle part dans l'administration des choses saintes, & quelle dans le soin de celles qui ne regardent que le dehors & la discipline exterieure de la Religion. L'on sçait assez que si Dieu borne leur puissance à l'esgard de l'un, il l'estend en faueur de l'autre; & que s'il a tesmoigné de la colere contre vn Prince qui auoit sacrifié sans attendre le grand Prestre, son indignation fut encore bien plus grande, & sa vengeance plus seuerere contre ceux qui negligant le soin & la gloire du Temple, auoient souffert que l'on sacrifiait, *in exelsis*, sur des lieux esleuez, symbole de la Superbe, compagne inseparable des opinions particulieres. Il yse donc sans vsurpation de son pouuoir, quand il empesche le progres des Schismes qui naissent dans l'Eglise. Et bien loin d'auoir besoin des remonstrances d'un Euesque, il en deuroit recevoir les mesmes remerciemens que receut autresfois l'Empereur Theodose de Leon premier, en semblable occasion: *Si quidem*, escrit ce grand Pape, *præter Imperiales & publicas curas, piissimam*

*sollicitudinem Christianæ religionis habetis, ne scilicet in populo Dei aut schismata, aut hæreses, aut ulla scandala conualescant.* Belles paroles, dans lesquelles il ne reconnoist pas seulement l'eminence de son autorité quant à la discipline & au reglement des mœurs; mais encore quant aux dogmes de la Foy, & à l'extirpation des Hérésies. Le Pape Anastase témoigne bien qu'il est dans le mesme sentiment, lors qu'il prie l'Empereur de faire condamner la memoire d'Acacius. Patriarche de Constantinople; & nonobstant l'Ordonnance des Euesques Orientaux, rayer son nom de la Matricule des Euesques, *Precamur, dit ce Pape, clementiam vestram ut specialiter nomen quod multis ex causis scandalum, vel offendificium Ecclesie concitauit, speciali appellatione taceatur.* Comme les Conciles ne sont pas tousjours necessaires pour l'assoupissement des Hérésies, & que du temps de saint Augustin, il s'en estoit peu trouué qui eussent besoin de ces solempnelles Assemblées, ainsi qu'il le remarque luy-mesme dans son Liure contre les Epistres de Pelagius. N'a-ce pas tousjours esté la pratique ordinaire des Empereurs, d'interposer leur autorité en ces occasions; tescmoin Theodose le Jeune qui condamna Pelage & Celestius, en l'année 418. c'est à dire dix ans apres la mort d'Arcadius, tescmoin Leon Pape, lequel escriuant au mesme Empereur en l'année 448. luy dit: *Cum euidentis esset Fidei causa, rationalibus causis ab indicenda Synodo fuisse abstinendum.* En effet, quel besoin de Synodes si difficiles à assembler, lors que par la Declaration, par les Lettres, par les Formulaires, & par le sentiment particulier de chaque Eglise, l'on peut decouvrir le sentiment general de toute l'Eglise. *Domini*

*singuli Episcopi scripto aut voce quid sentiant possunt profiteri*, dit saint Augustin au mesme endroit. Bien plus, le jugement d'une seule Eglise ne suffit-il pas souvent pour appaiser le mal general d'un Royaume entier? *Tam grande petitum Concilium, quam late propagatum videtur malum*, dit le Clergé de Rome dans la lettre qu'il escrit à S. Cyprien lors du Schisme des Nouatiens. Y a-t-il jamais eu question plus de Foy que celle de la reiteration du Baptême? Cependant qui l'a decidée? N'ont-ce pas esté les Empereurs? N'avons-nous pas un titre dans le Code Theodosien, *Ne sanctum Baptisma reiteretur*, dans lequel on trouue sept Constitutions differentes sur ce sujet. Gratian & Valentinian ne confirment-ils pas ce privilege quand ils disent, *Ea quæ circa Catholicam fidem, vel ordinavit antiquitas, vel parentum nostrorum auctoritas religiosa constituit, vel nostra Serenitas roboravit, integra & inuiolata custodire precipimus*. Mais si les Princes n'auoient conserué dans les premiers siecles aucune Iurisdiction sur les questions de Foy, d'où vient qu'ils conuoquoient les Conciles? D'où vient qu'ils y presidoient, & qu'ils opinoient? D'où vient qu'ils jugeoient; Qu'ils confirmoient les Iugemens Synodaux, & qu'ils les executoient? Et d'où vient que souvent ils commettoient des Iuges, pour connoître de ces sortes de differends? Commettre des Iuges, presider, juger, confirmer & executer, ne sont-ce pas autant de marques certaines de jurisdiction & de pouuoir? Constantin ne commit-il pas en l'an 314. un Proconsul pour juger le differend des Donatistes? S. Augustin n'en tombe-t-il pas d'accord en la cent soixante & deuxiesme de ses Epistres? Marcellinus jugea-t-il pas en l'an 411. une pa-

reille contestation entre les mesmes Donatistes & les Catholiques ? N'en auons nous pas le Rescrit en ces termes : *Cui disceptationi Principis loco te iudicem volumus præsidere*. Mais dequoy s'agissoit-il en ce differend ? Si quelqu'un doute que ce ne fust de la Foy, qu'il lise ce que porte cette Commission ou ce Rescrit ; *Negotium istud de veritatis ac Religionis agnitione suscipi*. Et sur la plainte que les Catholiques firent encore contre les Donatistes deuant Marcellin, que respondit cét Empereur ? S'excusa-t-il d'en prendre connoissance comme d'une chose qui ne fust pas de son ressort ? Tant s'en faut, il leur dit, *Libellus datus à vobis, euidenter ostendit schismatis ac hereseos crimen obiectum, quod probare vos conuenit*. Dequoy pour lors s'agissoit-il ? de rien moins que de sçauoir quelle Eglise estoit la Catholique : Quelles en estoient les marques ; S'il falloit rebaptiser les Heretiques. Qui furent les premiers qui s'adresserent à ce Prince, pour terminer ces questions differentes, ne fut-ce pas les Catholiques mesmes ; & qui non contents de s'y estre adressez, luy demanderent encore vn Iuge laïque pour en connoistre ? L'Epistre synodique du premier Concile de Constantinople, ne nous apprend-elle pas que tous les Canons, mesme pour la Foy, en furent soumis à l'Empereur Theodose, pour y adjouster, en retrancher ou confirmer tout ce qu'il jugeroit raisonnable ? Theodose le Jeune, ne suspendit-il pas l'execution du jugement rendu par Cyrille & les Euesques assemblez à Ephese contre Nestorius ? Et n'ordonna-t-il pas qu'il seroit assemblé de nouveau vn Concile, où les Magistrats qu'il auoit delegez, assisteroient pour juger des erreurs de cét Heretique,

tique, & du differend de Cyrile & de saint Jean d'Antioche? Et sans examiner si la clause qui exclud ces Iuges nommez par l'Empereur, de connoistre des dogmes de la Foy est veritable ou supposée; au moins est-il assuré, que l'Epistre Synodique rapportée dans l'action de ce Concile, porte expressement que les Euesques soumi-  
rent tous les Canons, tant de la Foy que de la Discipline, au jugement de ce Prince, pour estre par luy confirmez, & executez par le secours de son autorité: *Iubeat ut ea quæ à sancta & œcumenicâ synodo ad pietatis præsidium contra Nestorium; impiamque ejus doctrinam sancita sunt, vim suam obtineant, accedente ad robur eorum nutu & consensu pietatis vestræ.* Est-ce pas pour la mesme raison, que l'Empereur Marcian voulut estre present au Concile de Chalcedoine? *Nos ad fidem confirmandam, non ad potentiam aliquam exercendam exemplo religiosi Principis Constantini, Synodo interesse volumus, ne ulterius populi pravis suasionibus separentur.* L'Henoticon, ou cette Ordonnance faite pour concilier tous les differends touchant le Concile d'Ephese & de Chalcedoine, n'a t-elle pas esté composée par l'Empereur Zenon? N'auons-nous pas encore des Constitutions de Justinian, pour decider les questions des trois Chapitres. Ce que les anciens ont appelé l'*Ethêsis*, composée par Heraclius, & le *Typus*, dressé par Constans, sont en effet deux Formulaires de Profession de Foy que ces Empereurs firent publier, & dont ils ordonnerent la souscription dans les Prouinces de leur Empire. Si le Concile particulier de Latran les a rejettez, & si celuy de Constantinople ne les a pas approuvez, ce n'est pas tant par vn défaut de ces Princes, que parce qu'ils sembloient ouuer-

tement fauoriser le party des Monothelites. L'Empereur Leon dans l'Orient, & Charlemagne dans l'Occident, firent des Constitutions pour defendre l'adoration des Images pendant quelque temps, afin d'appaizer les differends qui troubloient l'Eglise, & alloient former vn schisme dans l'estenduë de leurs Estats. Ce fut au mesme Charlemagne, qu'en 813. les Euesques de France, dans le Concile d'Arles, soumirent leur jugement, pour adjoûter aux Canons, ou pour y diminuer ce qu'il estimeroit le plus raisonnable : *Si quid minus, ejus prudentia suppleatur; si quid verò secus quam ratio postulat, ejus judicio emendetur; si quid rationabiliter taxatum est, ejus clementia perficiat.* En la mesme année, les Euesques assemblez à Mayence, reconnurent la puissance du mesme Empereur, & luy demanderent la confirmation des Canons qu'ils auoient composez, tant pour la doctrine que pour les mœurs, luy adressant ces paroles : *De his omnibus valde indigemus vestro adjutorio atque sana doctrina, quæ & nos jugiter admoneat atque clementer erudiat, quatenus ea quæ paucis subter perstrinximus Capitulis, à vestra auctoritate firmentur; si tamen dignum reperitur, vestra magnifica Imperialis dignitas jubeat emendare, ut ita emendata nobis omnibus & cunctæ Christianæ plebi ac posterius nostris proficiant.* Combien auons-nous de Conciles François, dans lesquels les Roys adjoustant plusieurs choses à ce que les Euesques y auoient ordonné, se seruent de ces termes: *Hoc de nostro adjecimus.* Si nous consultons le cinquiesme Liure du Droit Grec & Romain, donné par Leunclaius, n'y trouuerons-nous pas que Demetrius Archeuesque de Bulgarie, escriuant à Cabalila, dit ces paroles. *Imperator ut communis Ecclesia-*

*rum Epistimonarcha existens, & dictis Synodalibus praest De-*  
*cretis; & robur tribuit, Ecclesiasticos ordines componit, & le-*  
*gem dat vite politiaeque eorum qui altari seruiunt.* Balsamon  
 passe bien plus outre en son Commentaire sur le quin-  
 ziesme Canon du Concile de Carthage, où il escrit,  
 que les Empereurs de Constantinople ayant euoqué  
 vne affaire Ecclesiastique, & le Patriarche Lucas s'en  
 estant plaint, il luy fut respondu par les Magistrats,  
 Que l'Empereur auoit le pouuoir de tout faire; & que  
 comme il auoit pû en premier lieu establir vn Iuge pour  
 juger vn Euesque, ou vn autre Clerc, il pouuoit aussi  
 legitimement changer vn jugement Ecclesiastique en  
 Ciuil. Philippes de Valois semble auoir fait quelque  
 chose de plus, lors qu'au rapport de Guillaume de  
 Nangis, ou du Continuateur, voyant en 1332. vne do-  
 ctine naissante qui commençoit à partager les esprits,  
 & menacer de Schisme, touchant la Vision beatifique,  
 dix Docteurs en Theologie assemblez par son ordre,  
 ayant condamné, comme vne erreur dangereuse, l'o-  
 pinion de ceux qui soustenoient que les Ames bien-  
 heureuses ne jouïssent de la vision qu'apres la resur-  
 rection; il ordonna que leur aduis seroit suiuy, & obli-  
 gea mesme le Pape, tombé comme les autres dans  
 cette erreur, de changer de sentiment, & de se retra-  
 cter. Ce pouuoir estoit si familier à nos Roys, & telle-  
 ment autorisé par l'vsage, qu'Hincmare en vne de ses  
 Epistres, dit qu'ils auoient dans leurs maisons royales  
 deux Officiers principaux, appelez *Apocrisfarij*, c'est à  
 dire, Comtes du Palais, dont l'un prenoit connoissan-  
 ce des affaires Ecclesiastiques, & l'autre des Seculieres,  
 pour en faire rapport au Roy. *Apocrisfarius de omni Ec-*

*clesiastica Religione vel Ordine ; necnon etiam Canonice vel Monastica altercatione , seu quæcunque Palatium adibant pro Ecclesiasticis necessitatibus sollicitudinem haberet, & ea tantummodo de externis Regem adirent, quæ sine illo plenius definiri non potuissent,* où il distingue le fait de la Religion d'avec la discipline. Enfin pour ne pas ennuyer par vne plus longue citation d'exemples, il suffira de conclure par les Actes du Concile de Trente, dans lesquels les Ambassadeurs de France monstrent & soustinent que le Roy de France auoit droit de faire des Loix & des Ordonnances touchant les choses sacrées & les affaires Ecclesiastiques, comme les Empereurs Constantin, Theodose & Valentinian. Nous sçauons bien que les Princes Chrestiens n'ont pas tousjours exercé sans trouble & sans dispute cette plenitude de puissance; & nous n'ignorons pas que quelques Peres se sont esleuez contre les Empereurs qui abusoient de ce pouuoir en fauorisant les Heresiarques, & qui employoient l'autorité du Sacerdoce royal plustost pour la destruction que pour l'edification de l'Eglise. La diuision de l'Empire Romain, & les diuerfes Monarchies qui se sont formées du débris de ce grand Colosse, ont aussi contribué à affoiblir l'vsage de cette puissance legitime, & ont forcé les Princes qui ne cedent jamais dans vn combat de preéminence, d'en suspendre l'exercice pour les affaires generales de la Chrestienté, se reseruant d'en vser dans les besoins & les necessitez de leurs peuples. Mais il n'est pas besoin pour justifier la conduite du Roy, la justice & la necessité de ses Declarations, d'apprendre des Histoires combien le secours & la protection de ses Predecesseurs a esté necessaire à l'Eglise, & combien l'estroite

l'estroite liaison du Sacerdoce avec la Royauté, entretenue depuis tant de siècles, a estouffé d'heresies, & prevenu de schismes dans leur naissance, veu qu'en cette rencontre sa pieté n'a point mis la main à l'encensoir; Que sa Declaration a esté precedée des Bulles des Papes, & des Deliberations, tant des Prelats que de la Sorbonne. Que le Formulaire a esté dressé par vn grand nombre d'Euesques, & par les mesmes présenté à sa Majesté; & que ce n'est qu'à leur instante priere que ses Lettres patentes l'ont autorisé. Et apres cela, on blasmera sa conduite de precipitation? Apres cela, on ne jugera pas facilement de quel costé vient l'attentat? De quelle part l'entreprise? si de ceux qui n'adorent que leurs propres opinions, & qui resistent à toutes les puissances, ou du plus juste ou du plus sage de tous les Princes, lequel excité par la voix & la plainte des Euesques, donne sa protection à l'Eglise agitée; & qui à l'exemple des Empereurs Chrestiens & des Roys ses predecesseurs, employe son bras victorieux à la manutention de la police Ecclesiastique, dont le soin luy est d'autant plus precieux, que l'vnité de la Foy & le culte des Autels est la premiere obligation de son Sacre, & le gage le plus asseuré de la benediction du Ciel & de l'obeissance des peuples. Ce fondement supposé, ne decouure-t-on pas clairement que de censurer par vne lettre publique, & si on l'ose dire, sans blesser le respect deu au caractere Episcopal, seditieuse; ce juste temperament receu par toute la France; sçauoir, qu'au refus que feroient les Euesques d'ordonner la souscription du Formulaire, les particuliers auroient liberté de le signer au Greffe de la Iustice royale, & qu'à faute de don-

ner cette preuue de leur soumission, ils demeureront incapables d'impetrer à l'aduenir aucun Benefice, c'est vouloir retomber dans ces anciennes erreurs tant de fois condamnées en ce lieu, & pretendre que les Ecclesiastiques sont entierement exempts de la puissance temporelle. Mais si tous les jours on les oblige de faire des declarations & des sermens dans les Tribunaux Seculiers: Si quand ils sont preuenus de crimes & engagez par vn Decret dans les liens de la Iustice, ou que par Sentence, ou par Arrest contradictoire, ou par contumace, vne condamnation infamante a esté prononcée contr'eux, personne ne doute que ces coups de foudre & ces playes qu'ils reçoient par l'autorité des Magistrats, ne les rendent inhabiles à toutes les nouuelles dignitez de l'Eglise, & quelquesfois mesme sujets à perdre celles dont ils estoient auparauant possesseurs & titulaires, comment oseroit-on soustenir qu'apres la decision des deux Papes, apres le suffrage & le consentement de quatre-vingts Euesques; apres les Decrets de la Sorbonne, il ne fust pas au pouuoir du Roy de fermer l'entrée des Benefices à tous ces rebelles, & tous ces perturbateurs du repos public, qui preferent le caprice de leurs scrupules imaginaires à l'autorité qu'ils doiuent respecter, & sous le joug de laquelle leur esprit, aussi bien que leur volonté, doit faire gloire de se rendre & de se captiuier. Mais pour voir clairement avec quelle chaleur Monsieur l'Euesque d'Aleçt se declare dans sa Lettre, le Protecteur & le Chef des Iansenistes, il suffit de prendre garde, qu'au lieu de justifier sa conduite & de parler des besoins de son Diocèse, il entreprend leur defense, & non seulement il approu-

ne leurs distinctions & leurs maximes; mais il se plaint encore de ce que les peines portées par la Declaration, sont trop rigoureuses; Que la priuation des Benefices de plein droit, est contraire à la disposition des Canons, & à la discipline de l'Eglise; Que l'on exclud du ministère de l'Autel des personnes d'erudition & de pieté, sans estre conuaincus d'autre crime que d'auoir suiuy l'exemple de leur Euesque: Euation captieuse, plainte frauduleuse, dans laquelle on doit remarquer, que pour rendre odieuse cette juste seuerité, il affecte de confondre avec artifice, des choses entierement distinguées par la Declaration; veu qu'elle ne menace du chastiment que ceux qui ne souscriront pas le Formulaire, apres qu'il leur sera présenté par leur Euesque; Qu'elle n'attaque point ceux qui resident dans les Dioceses où il n'est pas publié; Qu'elle ne les depouille ny des Dignitez ny des places qu'ils occupent dans l'Eglise; & que cette rigueur ne s'estend que sur les ames sourdes & rebelles à la voix de leur Prelat. D'où il est aisé de conclure, que Monsieur d'Aléct n'ayant pas approuué le Formulaire, n'a consequemment rien à craindre dans son Diocese: & cette seule obseruation decouure clairement l'inutilité de ses Remonstrances, fait voir combien elles sont affectées, & rend absolument inexcusable la liberté qu'il se donne d'accuser tout le monde de precipitation & d'ignorance, & de blâmer la conduite de toutes les Puissances. L'on auroit bien plus de raison de luy reprocher l'injustice de son procedé, & du refus qu'il fait de suivre l'exemple de ses Confreres, & de retorquer contre luy ce que luy-mesme escrit dans sa Lettre; Que dans les Dioceses où

les Ecclesiastiques ne souscriuent point, c'est plustost la faute des Euesques, que celle des particuliers. Estrange desordre ! horrible confusion ! quand on void les tenebres sortir du mesme endroit où deuroit naistre la lumiere. Mais puisque l'indulgence de la Loy va jusques à ne punir point cette faute, se contentant de dire avec l'Apostre, *Peccatum quidem est, sed non imputatur in poenam* ; quel besoin auoient ceux qui ne sont point accusez, d'entreprendre leur Apologie ? Mais aussi, quoy de plus dangereux que de souffrir la liberté qu'ils se donnent d'attaquer sous ce masque trompeur, & sous ce pretexte estudié, tout ce que nous reuerons de plus inuiolable, & de plus saint dans l'Estat & dans l'Eglise ? Mais outre que cette Lettre, contre laquelle nous formons nos plaintes, n'est qu'un tissu de propositions autant contraires à l'autorité Royale, qu'injurieuses au Pape & aux Euesques, & pour cette raison condamnable d'elle-mesme ; ne sçait-on pas d'ailleurs quels argumens & quelles consequences les Sectateurs de ces nouueautez en tirent pour autoriser leur rebellion ? Ne sçait-on pas qu'apres auoir par diuers artifices, excité le zele de ce Prelat, pour le porter à de si grands excès, ils en ont fait de si grands trophées, & en ont tiré des auantages si considerables, qu'ils publient par tout dans leurs escrits, que cette Remonstrance est demeurée sans repliche, & n'a pas esté improuuée, abusant ainsi de l'indulgence du Roy, lequel dissimulant par vne grace toute particuliere cét emportement, & excusant par vn Conseil de prudence ce zele indiscret auoit abandonné cette Lettre à la poussiere de son Cabinet, & donné le juste ressentiment qu'il

qu'il en auoit conceu à la dignité du Caractere, & aux autres qualitez d'un Prelat, qu'il vouloit supposer auoir esté poussé par des mouuemens estrangers, & s'estre laissé surprendre à de fausses lumieres. Mais il a bien paru par le succez, que cette grande benignité auoit plustost allumé le feu que de l'esteindre. Car aussi-tost apres que cette Lettre eut esté enuoyée, non seulement l'on a respandu des exemplaires par tout; mais elle a encore esté renduë publique par l'impression, afin de faire connoistre que ce n'estoit point vne Remonstrance adressée à l'oreille & au cœur de sa Majesté; mais vn reproche & vn Manifeste public, pour sonner le toxin de la guerre, & renouereller vn combat d'autant plus dangereux, qu'il s'adresse directement à la pieté & à l'autorité Royale, & que par ce libelle, & tous les autres debitez depuis deux ans, l'on trauaille tous les jours à endurcir les cœurs qui se piquent d'une fausse constance, & qui ont la presumption de croire, que c'est à eux seuls que Dieu a reserué l'ouuerture de la profondeur de ses conseils, & la reuelation des veritez eternelles. Mais les menaces fulminées par cette Lettre ne sont pas demeurées là: elles ont esté si fidellement suiues de leur effet, que Monsieur l'Euesque d'Aléct se laissant emporter à l'impetuosité de ses mouuemens, a par vne Ordonnance publique, frappé du foudre d'excommunication tous les Ecclesiastiques de son Diocèse qui souscriront le Formulaire, & du mesme coup ouuertement attaqué la Declaration; esleué Autel contre Autel, & tiré de sa Lettre écrite au Roy, vn de ses principaux argumens pour appuyer la nouveauté de son entreprise. Nostre dessein n'est pas de

nous plaindre de cette Ordonnance, ny d'en demander la suppression, ou d'en interjetter appel comme d'abus; c'est au Parlement de Thoulouse, dans le ressort duquel est situé l'Euesché d'Alé&, qu'il appartient d'agiter cette question. Aussi ne la produisons-nous que pour servir de tefmoin, de preuue & de conuiction, non pas de la verité de la Lettre escrite au Roy, dont l'original est entre nos mains; mais du desir, de l'impatience & de l'affectation que son Auteur a tefmoigné de la rendre publique, & pour faire voir que quand on en a distribué des coppies & souffert l'impression, ce n'a pas esté par hazard & sans participation; mais volontairement, & par ses ordres. Ainsi Monsieur l'Euesque d'Alé&, ayant luy-mefme diuulgué cette Lettre qui deuoit demeurer enseuelie dans le silence, il en a luy-mefme aussi prouqué la condamnation. Plus il a de reputation, plus il s'est acquis d'estime; plus on reuere ses sentimens, plus subtil aussi est le venin avec lequel il empoisonne les esprits; plus dangereuse sa doctrine, plus contagieuses ses opinions, & conséquemment plus puissant en doit estre le remede. Si c'estoit vne ame vulgaire, vne personne sans nom, on n'en craindroit pas si fort les suites. Mais son estime s'estant rendué venerable par les marques exterieures de sa pieté, & ses discours estant pour cette raison bien plus capables de seduire les esprits, le silence, & tous les autres remedes palliatifs ne suffiroient pas pour les détromper. Il faut noter & flectir cét Escrit par vne condamnation publique, laquelle en marquant ses erreurs, luy oste toute creance, sa suppression estant sans doute le preseruatif le plus assuré pour

guerir le mal, en trancher le cours, & empescher qu'il ne s'insinue. Les choses sont allées trop auant, & ont fait trop d'éclat pour les dissimuler dauantage, sans se mettre en danger de voir exciter de nouueaux troubles. N'est-ce pas tantost la saison de faire cesser par vne iuste feuerité, ce qu'un excez de retenüe n'a pû gagner sur les esprits obstinez? C'est à quoy nous sommes excitez, & par le deuoir de nos Charges, & par le commandement exprès du Roy, qui se lasse de voir que dans vn Estat si bien policé, dans vn Royaume si puissant, si florissant & si Chrestien, des sujets prennent la liberté d'escire contre les Declarations de leur Souuerain; des Euesques contre les Decisions du Pape, & contre le sentiment du plus grand nombre de leurs Confreres; & d'attenter, pour eluder tant d'autoritez, ce que l'on n'oseroit auoir entrepris pour aneantir la Sentence d'un Iuge subalterne, qui seroit passée en force de chose jugée. Nous scauons que Monsieur d'Aleat se defendra par les termes de respect & par les protestations d'obeissance, dont sa Lettre est remplie, d'auoir jamais attaqué la dignité royale. Que pour en adoucir l'aigreur, il luy donnera le titre de Remonstrance. Mais n'est-ce pas sous ce nom specieux que paroissent les Libelles & les Manifestes que l'on publie dans les occasions de Schisme & de reuolte, pour diffamer le gouvernement de l'Eglise, ou de l'Estat? Et si le caractere des Euesques leur donne vn accez facile au Trosne du Souuerain, est-ce pour le dépoüiller de son pouuoir que ce priuilege leur est accordé? Doient-ils abuser par des discours si peu respectueux de cette sainte liberté? Est-ce rendre l'honneur que l'on doit à la Majesté du

Prince, de luy donner des éloges, & mespriser son autorité; de le flatter de parolles, & de le combattre en effet; de louer ses actions heroïques, & d'abaisser sa puissance; d'admirer sa pieté & ses autres vertus, & de fouler son Sceptre & estre rebelle à ses ordres? *Non honoratur Imperator per legis contumeliam.* L'on ne rend pas hommage à vn Monarque par le mespris de ses Loix, ou si on l'honore ce n'est que des levres, & par vn sacrifice imparfait qui ne luy peut estre agreable. La mesure de nos respects est de reuerer autant sa conduite que sa personne, autant la sagesse de ses conseils que son diademe; & ses volontez autant que toute la splendeur qui l'enuironne. Ainsi Monsieur l'Euesque d'Alext ayant oublié tous ces deuoirs, & blessé directement vne autorité si royale & si sacrée, quelque faueur que merite sa personne, il n'est pas possible ny de defendre sa Lettre, ny d'excuser son procedé. Le Roy en vouloit dissimuler la faute; mais il le force par les coppies qu'il en a respanduës, de s'en plaindre, & d'en demander justice. Nous aurions, pour espargner sa reputation, traité volontiers cette Lettre comme vn ouurage supposé, sans attaquer que les seuls exemplaires manuscrits & imprimez, & sans aucunement parler de l'original. Mais comme s'il auoit peur que l'on doutast qu'il en fust l'auteur, il l'a cité luy-mesme comme son propre ouurage, dans vne Ordonnance qu'il a publiée dans son Diocese. Il s'en fait vn Bouclier. Il s'en sert pour donner de l'autorité & de la force à son Mandement. Il ne faut toutesfois pas s'imaginer, que dans cette Lettre rien ne soit reprehensible que la seule licence qu'on s'est donnée de la publier; le dessein n'en peut estre qu'injuste

qu'injuste & dangereux, puis qu'elle n'a pour but que l'aneantissement d'une Declaration verifiée dans tous les Parlemens du Royaume; Puis qu'elle combat la puissance Royale, accusant le Roy d'entreprendre sur la liberté des Autels; Puis qu'elle fait injure au Pape & aux Euesques, Qu'elle fauorise ouuertement la desobeissance des Iansenistes, & qu'elle ne peut apporter que du trouble dans les consciences, & du scandale dans l'Eglise. Aussi sommes-nous persuadez, que Monsieur l'Euesque d'Aléct n'aura pas plustost fait reflexion, tant sur les pernicioeux effets que cét Escrit est capable de produire, que sur l'artifice de ceux qui l'ont engagé dans cette faulse demarche, qu'il formera vne genereuse resolution de retirer les pas d'une route si funeste, de ne passer pas plus auant, & ne s'embarasser pas dauantage ny en repliques ny en Apologies, sans pouuoir attendre autre succez d'une perseuerance opiniastre, que de deuenir l'autheur d'un Schisme, & de se rendre illustre dans les siecles à venir par ses égaremens, & par sa cheute. Ce qui fait voir que le cours de cette Lettre, ne doit pas seulement estre arresté par police, & comme vn ouurage imprimé sans permission du Magistrat, mais qu'il est encore tres-important de la condamner en elle-mesme, comme vn libelle remply d'erreur & de propositions perilleuses. Tout ce qu'on entreprendroit autrement n'aboutiroit qu'à prendre l'ombre pour le corps, approuuer indirectement les remonstrances de Monsieur l'Euesque d'Aléct, & laisser en doute si la De-

claration doit estre reuouquée; si les Iansenistes ont droit d'en empescher l'execution; & si leurs opinions particulieres, appuyées du suffrage de ce Prelat, doiuent l'emporter sur l'autorité du Roy, du Pape & des Euesques. Comme donc il est tres-dangereux de laisser vne question de cette nature plus long-temps en balance; c'est à la prudence de cette auguste Compagnie, qui dans tous les temps a si courageusement defendu les droits du Roy, & la dignité de sa Couronne, de la terminer par ses Arrests. Le Roy qui dans vne telle occasion, pouuoit vanger la Majesté de l'Empire violée par cette Lettre, faire éclatter son indignation contre son Auteur, & se rendre justice à luy-mesme, vous la demande aujourd'huy, MESSIEURS, par nostre bouche, mais avec tant de moderation, qu'il vous laisse les Arbitres absolus de son ressentiment. Et bien que toutes les circonstances dont nous vous auons fait voir cette faute accompagnée; & que l'excez dans lequel s'est porté le Prelat, qui en est l'Auteur, semble ne pouuoir estre puny avec assez de seuerité; le respect neantmoins du caractere & de la dignité Episcopale inclinant nostre esprit du costé de l'indulgence, nous empesche de faire aucune requisition contre sa personne; & le zèle que nous auons pour tout ce qui regarde la paix de l'Eglise, l'intérest & la satisfaction du Roy nostre Maistre, estant retenus par l'esperance de ne plus voir à l'aduenir de semblables entreprises, lors que toute la France sera conuaincûe par cét exemple, que bien loin de trouuer pro-

tection en ce lieu, elles ne peuvent manquer d'estre  
 feuerement condamnées, nous auons estimé nous  
 deuoir reduire à demander seulement que l'origi-  
 nal de la Lettre de Monsieur l'Euesque d'Aleçt, en-  
 semble toutes les coppies imprimées & manuscri-  
 tes qui en ont esté distribuées, soient supprimées;  
 Et que defences soient faites à toutes sortes de per-  
 sonnes de quelque qualité & dignité qu'ils puissent  
 estre, de rien escrire sous quelque tiltre & pretexte  
 que ce soit, contre la Declaration verifiée en pre-  
 sence du Roy, le vingt-neufiesme Avril dernier, ou  
 contre le Formulaire artaché sous le contrescel, à  
 peine d'estre traitez comme perturbateurs du re-  
 pos public, & procedé extraordinairement con-  
 tr'eux. Et s'estant lesdits Gens du Roy retirez, apres  
 auoir laissé sur le Bureau l'original & la coppie im-  
 primée de ladite Lettre dudit sieur Euesque d'A-  
 leçt, & du Mandement par luy decerné ensuite;  
 Lecture faite desdites Lettre & Mandement; la ma-  
 tiere mise en deliberation, **LADITE COVR A**  
**ORDONNE ET ORDONNE**, que ladite Lettre  
 dudit Euesque d'Aleçt, ensemble les coppies im-  
 primées & non imprimées, seront & demeureront  
 supprimées; Et qu'à la requeste du Procureur Ge-  
 neral du Roy, il sera informé contre ceux qui ont  
 imprimé & fait imprimer lesdites coppies; pour l'in-  
 formation faite, rapportée & communiquée au-  
 dit Procureur General, estre ordonné ce qu'il ap-  
 partiendra. Fait inhibitions & defences à toutes  
 personnes de quelque qualité & condition qu'ils

puissent estre, de rien escrire sous quelque tiltre & pretexte que ce soit, contre la Declaration du Roy du vingt-neuf Avril dernier, & contre le Formulaire attaché sous le contrescel, à peine d'estre traitez comme perturbateurs du repos public, & procedé contr'eux extraordinairement. FAIT en Parlement le 12. jour de Decembre 1664.

Collationné.

Signé, DV TILLET.